

■ TRIBUNA POLITICA

La via da scola sco scola da la vita

DA MARTIN JÄGER,
CUSSEGLIER GUVERNATIV

Tenor las statisticas capita quasi la mesadad da tut ils accidents cun uffants en il traffic sin via sin la via da scola. Ils motifs per quai èn multifars. Els cumpiglian lieus nun-survesaivels, automobilistas ed automobilists senza quità, in traffic general pli intensiv sco er uffants distracts che na fan betg atenziun.

Per quest motiv èn nascids ils ultims onns en l'entira Svizra projects che duain megliar la segirezza en il traffic sin via per ils uffants da scola. Uschia ha per exempel il Touring Club da la Svizra proclamà gia l'onn 2000 ina concorrenza internaziunala cun la finamira da promover la conscienza dals uffants per ils privels en il traffic sin via. Classas da scola dal stgalim primar pon sa participar mintga onn ad ina concorrenza naziunala, e quai cun agid d'ina acziun da placats davart il tema segirezza dal traffic sin la via da scola. Questa concorrenza ha già fin oz intgins success allegraivels: Las propostas inoltradas per megliar la situaziun sin la via da scola vegnan examinadas mintgamai da las autoritads, e là, nua che quai è raschunavel e pussaivel, vegnan ellas er realisadas.



In ulteriur project davart il tema via da scola che metta il focus dentant cun clerlas finamiras sin il «ir a pe a scola» ha lantschà l'Associaziun traffic ed ambient, curt ATA. Cun «Walk to school» duain ils uffants emprender ch'ina via da scola a pe è sauna ed interessanta sch'ins resguarda las reglas dal traffic sin via e sch'ins sa cumporta correspudentamain. Sin la via da scola pon ins plinavant tgirar amicizias. Il punct da partenza per quest project da la ATA è stà cunzunt il fatg ch'ils ultims onns è s'augmentada en l'entira Svizra la tendenza d'uschenumnads «taxis da geniturs». Ils uffants vegnan manads da lur geniturs cun l'auto a scola ed alura er puspè manads a chasa uschia. Quai chaschuna per l'ina in traffic pli intensiv, per l'autra engrevgescha quai er l'ambient.

L'october passà sun jau vegnì infurmà a chaschun d'ina visita a Roveredo davart il project dal

consorzi da vischnancas da scola che stat sut il titel «Meglio a piedi», translata «Meglier a pe». L'autorità da scola, il mainascola e las persunas d'instrucziun èn sa mess la finamira da dar ina cuntrapaia als taxis da geniturs ch'èn già vegnids menziunads e ch'èn derasads er en il Grischun talian e da persvader las scolaras ed ils scolars sco er lur geniturs davart ils avantatgs da l'ir a pe a scola. Savens mainan ils geniturs lur uffants cun l'auto a scola cun la motivaziun che la via da scola na saja betg segira avunda. Il grond dumber d'autos che mainan ils uffants a scola e puspè a chasa augmenta dentant il privel ch'i dat accidents da traffic directamain davant la scola ed en sia vischinanza. In circol viziuz pia, cunter il qual ins vul prevenir a Roveredo faschond scleriments cumplissivs.

Il cussegl da scola, il mainascola e la magistraglia da la vischnanca da la Val Mesauc cun la populaziun la pli gronda han surpiglià en il Grischun ina rolla da piunier cun lur project per sensibilisar per ils secturs via da scola/segirezza en il traffic sin via. Il consorzi da vischnancas da scola vegn sustegnì per quest intent er da Zepura, in post spezialisà per la promoziun da la sanadad e per la prevenziun en il chantun Grischun. Jau gratulesch!